



## Pledpierla – In 10 ans

In desch ans saro eau aunch'adüna in praschun.

Avaunt bundant desch ans d'he eau cumbino nempe qualchosa magari sgrischaivel - eau d'he mordragio a trais persunas. Ma na cun intenziun, a d'eira ün discapit, in büro. Eau d'eira a scriver üna quittaunza, vaiva da ster sü per ir a piglier üna busta, sun sglischeda our cul culli ed aint per duonna Seraina e...

Mia povra secretaria d'eira morta!

Natürelmaing ch'eau la vaiva da fer svanir! Scha mieu schef vezza la morta, vegni cundanneda a mort – que d'eiran mieus impissamaints. Perque d'heja piglio la bela e l'he missa giò'n murütsch illa s-chantschia a dretta, l'he serreda e sun ida darcho in mieu büro. Cler ch'eau vaiva eir auncha da cunagir davent il saung. Cur cha d'eira liquido eir que, d'he eau dit a mieu schef cha a me nu giaja que uschè bain, uschè ch'eau giaja a chesa.

Il di zieva sun eau ida cul velo a lavur, schi davaunt mieu büro staiva baincumel la pulizia, armeda cun pistola, bastun, bouvas e vesta da sgüramaint.

Mieu schef vaiva bain gieu da svutrer illa s-chantschia – so'l diavel perche – e vaiva chatto a mia secretaria! Chi so che dubis ch'els vaivan?

Eau vulava dalum darcho ir a chesa, ma la pulizia nun ho lascho ir ad üngün fin ch'els nu vaivan fat lur dumandas a tuots.

Cur ch'els d'eiran a fin cun dumander a tuots, pudaivan tuots ir a chesa, be na eau. Que nu'm paraiva in uorden! Mieu schef es gnieu in mia direcziun ed el ho dumando, sch'eau nu possa svelto gnir in sieu büro. Eau sun ida cun el ed in büro m'ho'l fat chod suot il chül! Mieu schef ho cumanzo a sbragir cun me, ch'eau hegia üna rouda da memma! El m'ho perfin auncha musso l'utschè! Da la rabgia d'he eau cumanzo a picher tuot que chi d'eira intuorn me! E dandettamaing d'eira mieu schef tuot quiet...

Eau vaiva challo sainza vulair eir ad el! Il di zieva es la pulizia gnida tar me a chesa. Il cummissari ho dit ch'eau stögliä gnir sül post da pulizia. Eau d'he dalum confesso ch'eau hegia mordragio a mia secretaria ed a mieu schef. Perque m'haune dalum chatscheda in praschun.

Zieva ch'eau d'eira in praschun bod 1 an, d'heja cumanzo a planiser mia fügen, perche cha que nu'm plaschaiva in quista foura. Eau d'he druvo millis da fögls e d'he disegno sü plauns da la praschun e...

Finelmaing d'eira cò il di taunt bramo.

Cur ch’eau d’eira sdatasdeda, m’ho ün pulizist mno la culazchun. Eau d’he piglio il plat e l’he picho al pulizist sur il cho. Eau d’he piglio il pulizist e l’he miss sün meu let, al d’he zuglio, uschè cha que paraiva scu sch’eau füss lo a durmir.

Üngün nun ho do bada ch’eau sun fügida our da la praschun, üngün...

Eau sun riveda tar me a chesa ed il prüm d’heja cuschino qualchosa da bun. Alura sun eau ida a guarder televisiun. Dandettamaing ho que sclingio tar la porta. A d’eira meu chantunais. El vulaiva savair da me, scha m’hegian lascheda gnir our da la praschun già uossa. Eau d’he natürelmaing dit da schi, uschigliö füss quist tamberl sgür currieu be sech tar la pulizia. Intaunt haun ils pulizists in praschun bado cha que nu d’eira niauncha eau lo chi durmiva, dimpersè il pulizist mort...

E cur cha’d haun realiso ch’eau sun fügida our da la praschun, haune miss tuot in muvimaint per chatter a me! Intaunt d’eira meu chantunais gnieu aunch’üna vouta tar me a sclinger. Eau d’he aviert la porta e...

Tuot schockeda d’heja vis a meu chantunais davaunt me cun ün curtè!

Plain anguoscha sun eau currida sbragind scu üna narra tres tuot la chesa. E tuot in üna vouta am ho’l chatto in mia stanza da durmir. Eau d’eira persvasa cha uossa saja a fin, tuot mia lavur ed il schaschin pel giat. Ma cò m’es gnieu adimmaint per furtüna cha suot meu cuschin d’he eau adüna üna padella per cas urgaints. Aunz cha meu chantunais m’ho pudieu ferir cun sieu curtè, vaiva’l mia padella sün sieu cho. Eau d’he gieu temma da clamer a la pulizia, ma d’he que fat tuottüna, eir sch’eau vaiva darcho da turner in praschun.

La pulizia es gnida, ho piglio cun se a meu chantunais ed eir güst a me.

Uossa, zieva 10 ans praschunia, d’heja da rester in foura be auncha 50 annets.